

Cyflwyno Medalau Gee yn Hermon, Pencader a'r Talwrn



O'r chwith i'r dde: Aled Davies, Haulwen Lewis, a dderbyniodd y fedal eleni, a Nancy Jones, a dderbyniodd ei medal rai blynyddoedd yn ôl, ac sydd newydd ddathlu ei phen-blwydd yn 80 oed



O'r chwith i'r dde: Guto Prys ap Gwynfor, gweinidog yr eglwys, ac Aled Davies gyda Gwyn Howell Jones a'i briod



Plant Ysgol Sul y Tabernacl, Pencader, ynghyd â Haulwen Lewis, Chris Bolton, y gweinidog, ac Aled Davies



Rhan o'r gynulleidfa a ddaeth ynghyd i Siloam, Talwrn, gyda Gwynfor Parry yn eistedd yn y canol



Gwyn Howell Jones yng nghwmni ei deulu



O'r chwith i'r dde: Bethan Jones, Gwynfor Parry ac Aled Davies

Yn ystod mis Tachwedd cafwyd cyfle i ymuno â thair cynulleidfa leol er mwyn cyflwyno medal Gee i un o'r ffyddloniaid yno. Wrth ymweld â chapel Hermon ger Cynwil Elfed, capel y Tabernacl ym Mhencader a chapel Siloam, Talwrn, ger Llangefni, roedd sawl peth yn gyffredin bob tro.

Yn y lle cyntaf, roedd y croeso yn un cynnes, gyda chynulleidfaoedd lleol yn llenwi'r capeli – yn gymysgedd o aelodau ffyddlon a gweithgar, cymdogion a theulu'r sawl oedd yn derbyn y fedal, a chyn-aelodau'r ysgol Sul wedi gwneud ymdrech arbennig i fod yn bresennol.

Yn ail, er mai medal am ffyddlondeb i'r ysgol Sul oedd yn cael ei chyflwyno,

roedd yr hanes a gyflwynwyd gan weinidogion a swyddogion yr eglwys am y rhai oedd yn derbyn y fedal yn llawn teyrngedau o brysurdeb a gweithgarwch dros flynyddoedd lawer.

Guto Prys ap Gwynfor a gyflwynodd hanes David Gwyn Howell Jones i ni yn Hermon, Cynwil Elfed; Chris Bolton soniodd am weithgarwch Haulwen Lewis yn y Tabernacl, Pencader, yn arbennig ei gofal am y plant a'r bobl ifanc; a Bethan Jones yn Nhalwrn, ger Llangefni, yn sôn am gyfraniad Gwynfor Parry i holl weithgarwch yr eglwys.

Yn drydydd, wedi'r seremoni o gyflwyno'r medalau Gee gan Aled Davies ar ran y teulu Gee, roedd yna wledd wedi ei

pharatoi bob tro, un ai yn y festri neu yn Oriel Môn.

Mewn dyddiau a fu, trefnwyd un cyfarfod yn y de ac un yn y gogledd, ond ers y cyfnod clo aed ati i'w trefnu'n lleol. Heb amheuaeth, bu hynny'n fendith, o weld yr eglwys a'r gymuned gyfan yn ymgynnull i ddangos eu cefnogaeth a'u gwerthfarrogiad i rai a wnaeth gyfraniad arbennig yn eu milltir sgwâr.

Cofiwch fod y medalau'n cael eu cyflwyno'n flynyddol, a bod yn rhaid i enwau'r rhai a enwebir fod dros 75 oed. Y dyddiad cau ar gyfer derbyn medal yn 2024 yw 30 Mehefin. Mae ffurflen gais ar gael o wefan ysgolsul.com.